

Wednesday, May 7, 2025

Time - 2:30pm - 2:35pm

REGIONAL NEWS BULLETIN

(MIDDAY)

MOCK DRILL

Indona leh inbeihna thleng palha mipuite inpuahchahna dinhmun hriat nan ramchhung district 244 ah vawiin khan mock drill neih a ni a, Aizawl District ah pawh hmung hrang thlan bikah Mock drill hi buatsaih a ni.

Mock Drill hi Tuikhuahlang AIR Station leh Civil Hospital inkarah neih a ni a, chawhma dar 11 ah DC Office atangin siren tihrik niin Tlai dar 6:30 leh 6:35 inkarah Aizawl khawpui power supply tihtawp vek a ni anga, Siren tihrik a ni leh dawn a, Aizawl khawpui chhung Black Out chhung hian lirthei tlan zawng zawng te chu awm hmung din vek tur a ni a, lirthei engine leh light pawh off vek turin Aizawl Traffic SP Pu Stephen Lalrinawma chuan thu a chhuah a ni.

Sorkar laipui Ministry of Home Affairs hmalakna in defence mock drill hi neih tur a ni a, indo thlawhnaa inbeih thulha inralrinna Air Raid Sirens hman dan turte leh civil mite leh zirlaite tan hmelma te beihna thlen thula mahni inralrin leh inven dan turte enchhin a ni ang. Hei bakah hian indo thlen thulha harsatna thleng thei hrang hrang kawlpetha chhia avanga buaina leh hmung pawimawh hum dan turte leh insaseng dan turte pawh enchhin a ni dawn bawk a ni. He mock drill hi ramchhunga indo leh harsatna liantham thlen thula mipuite lo inbuatsaih lawk theihna tura duan a ni.



UNION MoS VISITS KHAZAWL

Union Minister of State for MSME and Labour & Employment Pi Shobha Karandlaje chuan vawiin khan Khawzawl district a tlawh a, Khawzawl office hotute nen inkawmin Khawzawl leh Chawngtlaik khaw hmung hrang hrang a tlawh bawk.

Union Minister Pi Shobha Karandlaje hi Khawzawl DC Pu K. Vanlalthiana leh hotu dang te'n an lo lawm a, District thuneitu hrang hrang ten district-a hmasawnna hnathawh chungchang hrilhhria in PowerPoint presentation an pe a, department hrang hrang hmalakna leh scheme hrang hrang tarlan niin Union Minister Pi Shobha Karandlaje chuan department hrang hrang zawhna a zawt a, hotute chu fuihin district tana theihtawp chhuah turin a sawm a ni.



LSA PROTEST

Lai Autonomous District Council Sorkar thiata, inthlan buatsaih ngiatin vawiin khan Lai Students' Association huaihawtin LADC pisa leh DC pisa kai tur te ni hnihna atan dan a ni.

Lawngtlai Students' Association chuan May 2 kha thuchhuah siamin Mizoram Larsap Gen (Rtd) Vijay Kumar Singh hnenah LADC thiata inthlanna buatsaih a nih theih nana hma la turin an ngen a, hemi hmalam pawh hian Governor hnenah ngenna an lo thlen tawh a, an thuchhuahah an ngenna chu Ni 4 chhung a tih hlawhtlin a nih loh chuan Sorkar Pisa te dan an tum thu tarlangin vawiin atang khan LADC Office leh DC Office a kaiturte an dang tan a ni.

Lai Students Association LSA President K. Lalhuliana chuan an duh ber chu LADC-a inthlan that ani an ti a, tunhnaia CEM inthlak zing lutuk chu mipuite zahlohma lian tak ani tih sawiin an ngenna chu sawrkarin hriatpui se, inthlan that chu buatsaih se an duh thu a sawi bawk.

Byte... LSA President

Lawngtlai Students' Association chuan LADC ah tun Sorkar Term kal lai ah Sorkar inthlak a thlen nasat vangin eng Party mah rorelna chang tura rin ngam an neih loh vangin Sorkar dinglai thiata, inthlanna buatsaih thuai chu an duh ber a nih thu an sawi a, an kal zel dan tur chu Committee in a ngaihtuah zel tur thu leh chanchin buatsaihlai thlengin Governor atangin eng thu mah an dawnloh thu Zirlai pawl hrugaitu chuan a sawi bawk.



OPERATION SINDOOR

India sipaite chuan nizan zanlai atang khan Pakistan leh Pakistan Occupied Kashmir-a firfiakte awmna hmun kapin Operation Sindoor beihpui an thlak.

Heng an bitum hmunte hi India rama firfiaka chetna tur ruahmanna an siamna leh thu an pekna hmun niin sipaite chuan an sawi a. Ministry of Defence thuchhuah tarlan danin hmun 9 bitumin kah a ni a. He beihpui an thlak hi uluk taka ruahman niin ram pahnih inkara boruak tih sosan tumna a ni lo tih a sawi a. Pakistan sipai hmunte kah tel an nih loh thu sawiin fimkhur taka bitum turté hi siam fel an ni tih a sawi bawk.

Defence Ministry chuan rapthlak taka Pahalgam a firfiakte chetnaa India mi 25 leh Nepali pakhat thihna chhanletna anih thu sawiin he inbeihnaa mawhpurtute chu na taka chhanlet an tum tih a sawi bawk.

